

BRASS BAND: ALGO ORIGINAL DI ARUBA

Pa: Joy Kock

Brass Band a origina na San Nicolaas. E ritmo cu actualmente ta esun di mas candente, ta pone tur hende banda di caminda cu ta waak e parada, move ora cu e ta pasa.

Mas o menos 16 aña pasa, Arnold Beyde a cuminsa cu Brass Band na Y.M.C.A. na San Nicolaas.

Conhuntamente cu Sam Hodge nan a traha duro y a trece algo nobo, esta, e ritmo di mas sabroso cu mundo conoce, e ritmo di Brassband. S.A.C. a jega di duna Y.M.C.A. - Brass band un premio chikito, pero nunca S.A.C. a pone mucho atencion ariba e ritmo aki.

Hopi hende aki na Aruba no ta na altura cu e ritmo di brassband ta original di Aruba. Despues di un estudio profundo y cu hopi entrevista cu personanan cu a jega di presencia carnavales na Trinidad, nos a jega na e conclusion cu e ritmo ta original di nos.

11 aña pasa, ami y mi colega di "Oruba Sex-

tet" bao direccion di Alex Odor, e tempo ey nos tabata toca na Sheraton Hotel, a lanta e prome Brass band na Playa. Por cierto e tabata e brassband di mas grandi cu Aruba a jega di weita te dia di awe. Sam Hodge y Arnold Beyde tabata nos conseheronan y nan tambe a toca hunto cu nos. Stanley La Cruz a percura pa train e seccion ritmico.

E Brassband aki tabata jama "Hotel All Stars". Despues mi a pasa un otro persona e Brassband over, pero lamentablemente nan no a wanté manera cu e tabata, y poco poco ela caba. Tempo cu nos a lanté, e tabata un estimulo grandi. Añanan cu a sigi nos por a ripara cu brassbandnan tabata lanta manera paddestoel.

E prome aña S.A.C. no a duna premio pa Brassband di aña. E siguiente, 1972, tabatin suficiente brassband, cu S.A.C. a dicidi pa pone premio pa e Brassband di aña, y "Hotel All Stars" a gana e pre-

mio ey. E premio tabata un beker kibra cu un homber ta serve tennis.

Mesun aña nos a dicidi cu "Hotel All Stars" lo no competi pa premio mas.

E motibo tabata, cu tur e supladornan (brass) tabata profesional y nos kier a duna otro chens pa gana e premio pa asina stimula nan mas.

Actualmente Brassband ta "in" y pa keda.

Den e ultimo parada di mucha na San Nicolas, mi a ripara cu tin algun cambio den ritmo. Esaki ta lastima, pasobra e cambio ariba e tom-tomnan, ta hacié zona manera calypso, algo cu e no ta. Maske mi ta kere den cultura moderno, toch tur brassband mester trata na wanta e ritmo na e sistema original. Conhuntamente cu Dera Gay, Dande, y awor e ritmo di Brassband, nos por bisa cu

ta di nos nan ta.

By the way, mi a tende un tuma Arubano, caminda e cantante ta canta cuenta di "marcha". Shonnan, Aruba no conoce marcha, pero parada di Carnaval.

Biniendo back ariba Brassband, mi kier a pone enfasis, pa toca piezanan Arubano. Den mi opinion, demasiado calypso di Trinidad ta wordo toca na Aruba.

Tambe mi a ripara cu hopi Brassband ta toca un stem

so, enbez di arregla e musica pa dos of tres voces y tambe cu contra melodía.

Esaki ta critica constructivo pa añanan venidero. Naturalmente steelbandnan y conhuntonan ariba truck, tin mesun valor pa nos Carnaval. Pero esun original di Aruba, ta e ritmo di Brassband. Nos ta spera cu S.A.C. lo duna reconocimiento na Arnold Beyde y Sam Hodge kendenan ta e pioneronan di Brassband.